

- N A C R T -

Na osnovu člana 13. Zakona o principima lokalne samouprave u Federaciji BiH („Sl. novine FBiH“, broj 49/06), člana 4. stav 2. Zakona o komunalnim djelatnostima („Sl. novine TK“, broj: 11/05, 7/07, 8/12 i 14/13), člana 25. Statuta Općine Banovići („Sl. glasnik općine Banovići“, broj 3/08), člana 91. Poslovnika o radu Općinskog Vijeća Banovići („Službeni glasnik općine Banovići“, broj 7/06), Općinsko Vijeće Banovići na _____ redovnoj sjednici održanoj dana _____ 2018. godine, d o n i j e l o je slijedeću:

O D L U K U
o komunalnom redu na području općine Banovići

I OPĆE ODREDBE

Član 1.

Ovom Odlukom uređuje se komunalni red i održavanje komunalnog reda na području Općine Banovići, a naročito u pogledu uređenja naselja, održavanja čistoće, čuvanja javnih i ostalih površina, držanja životinja i kafilerijskih poslova, uklanjanja protivpravno postavljenih predmeta sa javnih i drugih površina, kao i mjere za sprovođenje komunalnog reda i kaznene odredbe predviđene za povrede ponašanja utvrđene ovom Odlukom.

Član 2.

Pojedini izrazi upotrijebljeni u ovoj Odluci imaju slijedeće značenje:

1. Javne površine su površine u općoj upotrebi, a prema namjeni se razlikuju:
 - **javne saobraćajne površine** (javne i nerazvrstane ceste, pješačke staze, trgovi, mostovi, javni prolazi, javna stepeništa, javni parking prostori, taksi stajališta, autobuska stajališta, pločnici, trotoari, biciklističke staze, ostale površine javnog saobraćaja i saobraćaja u mirovanju, i slične površine),
 - **javne zelene površine** (parkovi, drvoređi, dječija igrališta, travnjaci, staze, pojas uz saobraćajne površine na kojima je zasađane zelenilo ili cvijeće, zelene površine uz stambene, stambeno-poslovne i javne objekte, površine uz vodotoke, trotoari i staze koje su sastavni dijelovi zelenih površina i slične površine),
 - **uređene rekreacione površine, sportska igrališta** te ostali javni sportski objekti i uređaji na njima kao i prostori povezani sa tim terenima i oko njih,
 - **ostale površine uz objekte** koji su namjenjeni za javne priredbe, otvoreni pijaćni i tržišni prostori i prostori oko prodajnih površina, spomen obilježja, javne česme i prostor oko njih, neizgrađeno građevinsko zemljište i neuređene javne površine i prostori.
2. **Komunalni objekti oprema i uređaji u općoj upotrebi** su javna rasvjeta, informativni panoi, javni satovi, javni wc-i, fontane, panoi, klupe za sjedenje, javne telefonske govornice, orijentacioni planovi, znakovi obavijesti i zabrane, skulpture, spomenici žardinjere, posude za cvijeće, posude za otpadke, te drugi objekti i uređaji.

Član 3.

Područjem Općine Banovići, u smislu odredaba ove Odluke smatra se urbano područje općine Banovići obuhvaćeno graničnim linijama I, II, III zone gradskog građevinskog zemljišta, zone izvan tog zemljišta koje pripadaju IV, V i VI zoni ostalog građevinskog zemljišta i ostalo područje Općine Banovići koje ne pripada zonama gradskog ili ostalog građevinskog zemljišta.

II UREĐENJE NASELJA

Član 4.

Uređenjem naselja, u smislu ove odluke, smatra se održavanje ograda, bašta, drvoređi, reklama, natpisa i izloga, spomenika, spomen česmi, spomen ploča, skulptura i sličnih objekata, rekreacionih površina i javnih sportskih igrališta, komunalnih objekata i uređaja u općoj upotrebi, fontana, autobusnih i željezničkih stanica, stajališta javnog autobusnog prevoza, reda kod utovara i istovara materijala i odlaganja otpadaka, dječijih igrališta, kao i javnih zelenih, saobraćajnih i ostalih površina.

1. Uređenje ograda, bašta, drvoreda i slično

Član 5.

Ograđivanje javnih površina po pravilu se vrši metalnim stubićima ili ukrasnom živicom na mjestima gdje to neće ometati normalno kretanje pješaka ili odvijanje saobraćaja, uz obavezno pribavljanje stručnog mišljenja službe nadležne za komunalne poslove.

Ukoliko je za postavljanje ograde potrebno pribaviti urbanističko-tehničku dokumentaciju u skladu sa propisima o prostornom uređenju i građenju, urbanističko-tehničku dokumentaciju izdaje služba nadležna za poslove prostornog uređenja i građenja.

Član 6.

Ograde od ukrasne živice uz javne saobraćajne površine moraju se redovno održavati i orezivati, tako da ne ometaju odvijanje saobraćaja i kretanje pješaka.

Član 7.

U pogledu visine, materijala, oblika, boje i načina izrade, ograde se moraju prilagoditi okolnom ambijentu, što se utvrđuje prema uslovima iz stručnog mišljenja odnosno urbanističko-tehničke dokumentacije.

Vrata i kapije uličnih ograda ne smiju se otvarati prema ulici, ukoliko na bilo koji način ometaju saobraćaj ili kretanje pješaka i izlaze na javnu površinu.

Član 8.

Bašte, voćnjaci i druge slične površine ispred zgrada (ograđene ili neograđene), ograde, kao i neizgrađena zemljišta uz javne površine, vlasnici i korisnici moraju držati urednim.

2. Reklame, natpisi, plakati, oglasi i izlozi

Član 9.

Reklame, natpise, izloge i zaštitne naprave na izlozima, reklamne ormariće i plakate, u smislu odredaba ove odluke, čine:

- a) transparent,
- b) jarbol sa reklamnom zastavom,
- c) reklamni pano:
 - samostojeći reklamni pano (billboard, bigboard, megaboard),
 - samostojeći reklamni pano na krovu objekta (displej, maketa, figura, slovo, zaštitni znak, druge kutijaste figure, makro ekrani sa filmskom ili TV slikom i slični uređaji),
 - reklamni pano na fasadi i ogradi objekta (displej, maketa, figura, slovo, zaštitni znak, druge kutijaste figure, makro ekrani sa filmskom ili TV slikom i slični uređaji),
 - pokretni reklamni pano (kavalet),
- d) reklamna vitrina (city light i totem)
- e) reklamna folija na izlogu poslovnog prostora
- f) reklama na zaštitnoj ogradi gradilišta
- g) reklamno platno na građevinskim skelama
- h) mural
- i) plakat
- j) reklama u vrijeme predizborne kampanje – političko oglašavanje
- k) reklamno - oglasna tabla i
- l) ostale reklame

Reklamne konstrukcije i reklamni panoi do 12 m², reklame, reklamni svjetleći i drugi ormarići, jarboli, zastave i slični natpisi, postavljaju se na osnovu stručnog mišljenja izdatog od strane općinske službe nadležne za prostorno uređenje i građenje, uz obavezu plaćanja naknade za zauzimanje javne površine utvrđene shodno odluci kojom je određena visina naknada za privremeno korištenje javnih površina.

Reklamne konstrukcije i reklamni panoi veći od 12 m², postavljaju se na osnovu odobrenja za građenje, u skladu sa propisima o prostornom uređenju i građenju, uz obavezu plaćanja naknade za zauzimanje

javne površine shodno odluci kojom je određena visina naknada za privremeno korištenje javnih površina.

Reklamni panoi uz magistralne i regionalne puteve, postavljaju se na osnovu odobrenja Ministarstva prostornog uređenja i zaštite okolice TK-a, osim u gradskom području.

Izuzetno, općinska služba nadležna za prostorno uređenje i građenje može za određene manifestacije i druge prilike periodičnog karaktera, dati odobrenje za privremeno postavljanje navedenih predmeta i objekata, ali se oni moraju ukloniti odmah po prestanku razloga zbog kojih su postavljeni.

Član 10.

Predmeti i uređaji iz člana 9. ove Odluke moraju se održavati u ispravnom stanju, a dotrajali se moraju obnoviti, odnosno zamijeniti.

Obnavljanje odnosno zamjenu naprava iz stava 1. ovog člana vrši njihov vlasnik odnosno korisnik.

Član 11.

Plakati, oglasi i slične objave mogu se postavljati na oglasnim pločama, oglasnim stubovima i u oglasnim ormarićima, isključivo uz saglasnost općinske službe nadležne za komunalne poslove, osim u slučaju postavljanja posmrtnica.

Saglasnost za postavljanje plakata organizator priredbe, ili proizvođač proizvoda koji se oglašava (u daljem tekstu: oglašivač), dužan je zatražiti najkasnije u roku od 48 sati prije postavljanja plakata.

Uz zahtjev je oglašivač dužan priložiti i primjerak plakata koji se oglašava uz obavezno navođenje dimenzija, kao i navesti ukupan broj plakata koji se postavljaju i lokacije za koje traži odobrenje.

Nadležna služba, uz odobrenje za postavljanje, odredit će i visinu naknade za postavljanje i uklanjanje plakata shodno odluci kojom je određena visina naknada za privremeno korištenje javnih površina, kao i rok za uklanjanje plakata.

Uredno postavljene plakate zabranjeno je prljati, oštećivati ili uništavati

Član 12.

U odobrenju za postavljanje predmeta iz člana 9. ove odluke, odrediti će se mjesto, način i vrijeme na koje se postavlja naprava, kao i druge uslove u vezi sa postavljanjem ovih naprava.

U odobrenju za postavljanje predmeta iz člana 9. ove odluke, za njihovo postavljanje na objekte i zemljišta koji su u vlasništvu općine, utvrdit će se i obaveza i rok plaćanja, kao i visina naknade za postavljanje, te prestanak važenja odobrenja u slučaju neplaćanja naknade ili neurednog plaćanja naknade u skladu sa odlukom kojom je određena visina naknada za privremeno korištenje javnih površina.

U slučaju prestanka važenja odobrenja za postavljanje predmeta iz st. 1. i 2. ovog člana, korisnik je dužan ukloniti napravu najkasnije u roku od 10 dana od dana prestanka važenja odobrenja.

U slučaju da korisnik ne postupi u roku utvrđenom odredbama iz stava 3. ovog člana, predmet će se ukloniti po nalogu komunalnog inspektora o trošku korisnika, a putem javnog komunalnog preduzeća ili drugog pravnog subjekta.

Član 13.

Zabranjeno je postavljanje plakata, oglasa i sličnih objava van dozvoljenih mjesta, kao i ispisivanje poruka bilo kojeg sadržaja, a naročito na: fasadama, stalnim ogradama, potpornim zidovima, rasvjetnim stubovima, stubovima saobraćajne signalizacije i ostalim stubovima, energetskim i drugim postrojenjima i sličnim objektima, kao i na trotoarima.

Plakati, oglasi i slične objave, postavljene van dozvoljenih mjesta, uklonit će se po nalogu komunalnog inspektora o trošku fizičkog ili pravnog lica koje ih je postavilo, a putem javnog komunalnog preduzeća ili drugog pravnog subjekta.

Član 14.

Reklamni natpisi, odnosno firme vlasnika, ili korisnika poslovnih prostorija na zgradi, moraju biti čitljivi, tehnički i estetski oblikovani, uredni i jezički ispravni, i ne smiju svjetlom, ili zvukom ometati ostale korisnike zgrade u mirnom korištenju zgrade.

Izlozi, izložbeni ormarići i drugi slični objekti postavljeni na zgradi, moraju biti tehnički i estetski oblikovani, odgovarajuće osvijetljeni, u skladu s izgledom zgrade i okoline.

Član 15.

Svjetleći natpisi i reklame moraju biti upaljeni, a izlozi osvijetljeni cijele noći u skladu s režimom rada javne rasvjete, osim u slučajevima štednje električne energije i drugim vanrednim okolnostima.

Svaki kvar na svjetlećem natpisu ili reklami, korisnik mora otkloniti najkasnije u roku od tri dana od dana nastanka kvara.

Neispravne svjetleće natpise, odnosno reklame, kao i one koje se ne mogu popraviti, korisnik je dužan odmah ukloniti i zamijeniti novim.

Član 16.

Reklamni natpisi i firme se mogu postavljati u visini od najmanje 2,5 metara od nivoa pločnika, odnosno ulice, a samo izuzetno u izlozima i na manjoj visini.

Svi izlozi moraju biti osvijetljeni sopstvenom svjetlošću odgovarajuće snage, s tim što izvor svjetlosti ne smije biti okrenut prema prednjoj strani izloga (ulično staklo), niti postavljen s vanjske strane izloga.

Reklamni natpisi i firme se mogu postavljati isključivo na osnovu odobrenja općinske službe nadležne za prostorno uređenje u kojem se određuju svi bitni elementi za postavljanje firme.

Natpisi i firme postavljene bez odobrenja, bit će uklonjene odmah, a najkasnije u roku od sedam dana o trošku vlasnika, odnosno korisnika natpisa i reklame.

Član 17.

Vlasnik, odnosno korisnik natpisa i firme, dužan ju je održavati na način utvrđen u članu 14., 15. i 16. ove Odluke.

Neispravnim natpisom i firmom se smatra natpis i firma čija je ploča na kojoj je ispisana naprsila, na kojoj su pojedina slova nečitljiva, ili je na bilo koji drugi način oštećena.

Neispravan natpis i firmu vlasnik je dužan dovesti u ispravno stanje u roku od sedam dana od dana nastanka oštećenja.

Član 18.

Zabranjeno je postavljanje reklamnih natpisa i firmi na drveću, parkovskom zelenilu, na uličnim stubovima (rasvjetnim, saobraćajnim i drugim), na javnim objektima koji imaju kulturnu i historijsku vrijednost, vjerskim institucijama, mostovima, spomen-obilježjima i sličnim objektima, kao i na objektima označenim u članu 13. stav 1. ove Odluke.

Član 19.

U slučaju prestanka rada ili preseljenja u drugu poslovnu prostoriju, vlasnik ili korisnik reklamnog natpisa ili firme, dužan je da ih ukloni u roku od 10 dana od dana prestanka rada ili preseljenja, a mjesto gdje je bio istaknut reklamni natpis, odnosno firma, dovede u prvobitno stanje.

Ako vlasnik, ili korisnik reklamnog natpisa ili firme, ne postupi u skladu s obavezom propisanom u prethodnom stavu, uklanjanje reklamnog natpisa ili firme izvršit će se po nalogu općinskog komunalnog inspektora o trošku i na rizik vlasnika odnosno korisnika.

Član 20.

Natpisi, reklame, reklamne ploče, reklamne konstrukcije, jarboli za zastave, transparenti i drugi prigodni natpisi, izlozi, zaštitne naprave na izlozima (stakla, prozori, roletne, tende i slično), oglasne ploče, oglasni stubovi i oglasni ormarići, mogu se postavljati samo na osnovu odobrenja nadležne općinske službe, a na za to određenim mjestima.

Predmeti, uređaji i naprave iz prethodnog stava, moraju se održavati u ispravnom stanju, a dotrajali obnoviti, odnosno zamijeniti.

Obnovu, odnosno zamjenu naprava iz prethodnog stava, vrši njihov vlasnik ili korisnik, odnosno općinska služba nadležna za komunalne poslove u slučaju da se radi o napravama u vlasništvu Općine i koja služi općem javnom oglašavanju.

Član 21.

Za postavljanje predmeta i objekata, iz člana 20. ove Odluke, na javne površine i neizgrađeno građevinsko zemljišta čiji je vlasnik Općina Banovići ili koje neposredno koristi, te na objekte na kojima Općina Banovići ima pravo vlasništva ili njima upravlja, plaća se naknada.

Visina naknade, iz prethodnog stava, određuje se odlukom o visini naknade za privremeno korištenje javnih površina u zavisnosti od zone u kojoj se naprava postavlja i veličine naprave.

Obveznik plaćanja naknada je fizičko, ili pravno lice, koje postavlja naprave iz člana 20. ove Odluke.

Član 22.

Uz zahtjev za postavljanje naprava iz člana 20. ove Odluke, bilo po osnovu konkursa ili na drugi način, podnosilac je dužan priložiti, ako se naprava postavlja na zgradu, ili na neki drugi objekt, skicu reklamne naprave, tehnički opis, skicu ili fotografiju mjesta gdje se naprava postavlja, a za svjetleće naprave elektroenergetsku saglasnost i proračun elektroinstalacije.

Za veće reklamne konstrukcije i konzolne reklame podnosi se i statički proračun.

Član 23.

Ukoliko se reklamne naprave postavljaju na zemljište, uz zahtjev je potrebno priložiti i skicu predmeta s tehničkim opisom, kao i mikrolokaciju s ucrtanim položajem predmeta na kopiji katastarskog plana.

Ukoliko su reklamne naprave osvijetljene, uz zahtjev se prilaže i elektroenergetska saglasnost te saglasnost vlasnika objekta s kojeg se koristi električna energija.

Ukoliko se električna energija koristi s javne rasvjete, korisnik je dužan plaćati naknadu prema ostvarenoj potrošnji električne energije na račun Općine Banovići.

Član 24.

Kada se reklamne naprave postavljaju na objekte, ili zemljište koji su u vlasništvu drugog fizičkog ili pravnog lica, podnosilac zahtjeva je dužan uz dokumentaciju, propisanu u članu 20. ove Odluke, priložiti i dokaz o vlasništvu, odnosno korištenju ili upravljanju objektom ili zemljištem, kao i saglasnost vlasnika ili korisnika objekta ili zemljišta, osim u slučaju postavljanja naziva firme.

Ako se reklamna naprava postavlja na područje, ili objekt određen kao spomenik kulture, podnosilac zahtjeva je dužan priložiti i mišljenje nadležnog organa za zaštitu spomenika kulture.

III SPOMENICI, SPOMEN PLOČE, SKULPTURE I SLIČNI OBJEKTI

Član 25.

Na području općine Banovići mogu se postavljati spomenici, spomen ploče, skulpture i slični predmeti na objekte i površine, kao i uklanjati ranije postavljeni predmeti.

Postavljanje i uklanjanje predmeta, iz stava 1. ovog člana izuzev nadgrobnih spomenika vrši se na osnovu rješenja općinske službe nadležne za prostorno uređenje i građenje, u kojem će se utvrditi lokalitet, površina i način održavanja istih.

Član 26.

Za postavljanje predmeta, iz prethodnog člana, podnosilac zahtjeva je dužan da pribavi i mišljenje općinske službe nadležne za društvene djelatnosti, odnosno odgovarajućeg kantonalnog ministarstva.

Ukoliko se radi o postavljanju spomen obilježja od značaja za Tuzlanski kanton, ili ako se postavlja ili uklanja predmet za koji se utvrdi da ima obilježja spomenika kulture, ili je spomenik kulture, pribavlja se i mišljenje nadležnog organa za zaštitu spomenika kulture,.

Član 27.

Kada se predmet iz člana 25. ove Odluke postavlja na objekt ili zemljište koji su u vlasništvu drugog fizičkog ili pravnog lica, podnosilac zahtjeva je dužan pribaviti i dokaz o vlasništvu, odnosno saglasnosti vlasnika, korisnika, ili lica koje upravlja nekretninom.

Član 28.

Postavljeni spomenici, spomen ploče, skulpture i slično, ne smiju se prljati, uništavati, ili na drugi način oštećivati.

Predmete iz prethodnog stava dužan je održavati njihov vlasnik, odnosno lice po čijem je zahtjevu predmet postavljen, a ukoliko to lice nije poznato, ili više ne postoji, o održavanju se brine općinska služba nadležna za komunalne poslove.

IV REKREACIONE POVRŠINE I JAVNA SPORTSKA IGRALIŠTA

Član 29.

Rekreacione javne površine, sportska i dječija igrališta i ostali javni sportski objekti, kao i objekti na njima, moraju se održavati u ispravnom stanju.

Na površinama i objektima iz prethodnog stava moraju na vidnom mjestu biti istaknute odredbe o održavanju reda, čistoće, zaštite zelenila i slično.

Za urednost površina i ispravnost objekata brinu se pravna i fizička lica koja tim površinama i objektima upravljaju, odnosno koja se tim površinama koriste.

Član 30.

Rekreacione javne površine, sportska igrališta, dječija igrališta, zelene neuređene javne površine, neuređena i devastirana igrališta i ostali javni sportski objekti, mogu se povjeriti na korištenje, održavanje i upravljanje, uz odgovarajuću naknadu pravnim licima, udruženjima građana i drugim subjektima koji bi iste koristili u svrhu promoviranja sporta i sportskih aktivnosti.

Povjeravanje na korištenje, održavanje i upravljanje površina iz stava 1. ovog člana vrši Općinsko Vijeće Banovići, a uvjeti i način korištenja predmetnih površina regulišu se ugovorom kojeg Općinski Načelnik zaključuje sa korisnikom površine.

V. KOMUNALNI OBJEKTI I UREĐAJI U OPĆOJ UPOTREBI

Član 31.

Na području općine Banovići, na lokacijama koje odredi općinska služba nadležna za komunalne poslove uz prethodno pribavljenu saglasnost općinske službe nadležne za prostorno uređenje i građenje izgrađuju se i postavljaju komunalni objekti i uređaji u općoj upotrebi.

Komunalni objekti i uređaji postavljaju se na osnovu odobrenja općinske službe nadležne za komunalne poslove, izuzev komunalnih objekata i uređaja za koje je potrebno pribaviti odobrenje u

skladu sa propisima o prostornom uređenju i građenju, kada odobrenje donosi općinska služba nadležna za prostorno uređenje i građenje.

Član 32.

Na području Općine Banovići, na mjestima određenim u skladu sa odredbama člana 31. ove Odluke postavljaju se posude za otpadke.

Zabranjeno je postavljanje posuda za otpadke na:

- stubove saobraćajnih znakova,
- stubove javne rasvjete,
- jarbole za zastave,
- drveće i drugo rastinje,
- mjesta na kojima ometaju bezbjednost saobraćaja i
- druga mjesta na kojima narušavaju estetski izgled naselja.

Na posude za otpadke mogu se postavljati odgovarajući natpisi koji upozoravaju građane na zaštitu okoline i poštovanje komunalnog reda.

O postavljanju, održavanju i zamjeni posuda za otpadke brine se pravno lice kome je ugovorom povjereno vršenje tih poslova.

Član 33.

Izuzetno od prethodnog člana, korpice za smeće na javnim površinama i objektima u kojima se obavlja poslovna djelatnost mogu postavljati i druga pravna i fizička lica, a na osnovu odobrenja općinske službe nadležne za komunalne poslove, u kom slučaju se o njihovom održavanju brine lice koje ih je postavilo.

Član 34.

Na području Općine Banovići, na mjestima određenim u skladu sa odredbama člana 31. ove Odluke postavljaju klupe za sjedenje.

O postavljanju, održavanju i zamjeni klupa za sjedenje brine se pravno lice kome je ugovorom povjereno vršenje tih poslova.

Član 35.

Na području općine Banovići grade se i postavljaju fontane i drugi slični ukrasni objekti na mjestima gdje svojim izgledom uljepšavaju okolinu, određenim u skladu sa odredbama člana 31. ove Odluke.

Javne fontane po pravilu moraju raditi od 01. aprila do 31. oktobra, a o njihovom održavanju brine se pravno lice kome je ugovorom povjereno vršenje tih poslova.

U fontanama je zabranjeno kupanje ljudi i životinja, bacanje smeća, drugih predmeta ili supstanci, otpadaka, te na bilo koji način narušavanje vanjskog izgleda ili oštećenje fontane.

Član 36.

Protivpožarni hidranti i hidranti za pranje javnih površina moraju se održavati u ispravnom stanju, a o njihovom održavanju brine se pravno lice kome je ugovorom povjereno vršenje tih poslova.

Član 37.

Javni wc-i moraju biti opremljeni savremenom opremom, moraju se održavati u urednom i ispravnom stanju, te moraju raditi tokom dana najmanje u vremenu od 07.00 do 20.00. sati, a o njihovom održavanju i upravljanju brine pravno lice kome je ugovorom povjereno vršenje tih poslova.

Član 38.

Javne telefonske govornice i poštanske sandučice uz odobrenje i na mjestima određenim u skladu sa odredbama člana 31. ove Odluke, postavlja javno preduzeće poštanskog ili telekomunikacionog saobraćaja, koje je dužno iste održavati u ispravnom stanju, te kvarove i eventualna oštećenja otklanjati najkasnije u roku od tri dana.

Član 39.

Na trgu i pješačkoj zoni mogu se postaviti javni satovi .

Pravna i fizička lica mogu na zgradama koje koriste postavljati satove uz odobrenje pribavljeno u skladu sa odredbama člana 31. ove Odluke.

Član 40.

Komunalni objekti i uređaji u općoj upotrebi, moraju se održavati u ispravnom stanju.

Zabranjeno je komunalne objekte i uređaje u općoj upotrebi uništavati ili na bilo koji drugi način oštećivati.

VI AUTOBUSKE I ŽELJEZNIČKE STANICE, STAJALIŠTA TAKSI PREVOZA, STAJALIŠTA JAVNOG PREVOZA PUTNIKA I PARKIRALIŠTA

Član 41.

Stanične zgrade na autobuskoj i željezničkoj stanici, otvorene čekaonice, stajališta taksi prevoza, javna parkirališta i peroni, ograde oko perona, sanitarni uređaji i prostori ispred stanice, te čekaonice putničkog, teretnog, željezničkog, autobusnog i drugog saobraćaja moraju biti u ispravnom stanju i stalno održavane.

Klupe i ostali predmeti kao i nasadi koji se nalaze na peronima i ispred staničnih zgrada i otvorenih čekaonica moraju biti čisti, uredni i ispravni, a dotrajale i oštećene predmete i nasade vlasnici, odnosno korisnici moraju odmah ukloniti i zamijeniti novim.

Objekte i predmete iz stava 1.ovog člana održava vlasnik, odnosno korisnik.

Član 42.

Kad su javne površine izgrađene i uređene kao stajališta javnog saobraćaja na njima se postavljaju nadstrešnice za zaštitu ljudi, te obavezno i prateća oprema: korpice za smeće, klupe, informacione table sa oznakom stajališta i ostalim informacijama vezanim za javni promet i slično.

Nadstrešnice i prateću opremu postavlja, održava i njima upravlja vlasnik odnosno korisnik ili pravno lice kome je ugovorom povjereno vršenje tih poslova.

Stajališta javnog autobusnog saobraćaja moraju se održavati u urednom i ispravnom stanju, a svako oštećenje mora se otkloniti najkasnije u roku od sedam dana.

VII RED KOD ISTOVARA, UTOVARA I SMJEŠTAJA GRAĐEVINSKOG MATERIJALA I ROBE NA JAVNIM POVRŠINAMA

Član 43.

Za istovar, smještaj i utovar građevinskog materijala i drugih predmeta i roba, podizanje skela, polaganje tračnica za kran i druge građevinske mašine, te popravke vanjskih dijelova zgrade i slične građevinske radove može se u skladu sa odobrenjem općinske službe nadležne za prostorno uređenje i građenje, privremeno koristiti javna površina ili neizgrađeno građevinsko zemljište.

Član 44.

Kod izvođenja radova označenih u članu 43. ove Odluke, mora se osigurati prohodnost trotoara i kolovoza, osim u slučajevima kada to obim radova ne dozvoljava, a izvođač je dužan preduzimati mjere protiv prljanja i oštećivanja zauzete površine i to :

- čistiti javne površine oko gradilišta od svih vrsta građevinskih i drugih materijala, blata i slično, a čije je taloženje posljedica izvođenja radova iz člana 43. ove Odluke,
- polijevati trošni materijal (šut i slično) za vrijeme rušenja građevinskih objekata kako bi se spriječilo stvaranje blata i prašine,
- čistiti ulične slivnike u neposrednoj blizini mjesta gdje se izvode radovi,
- prati i čistiti vozila prije njihovog izlaska sa gradilišta, te prati i polijevati prilazni put do gradilišta.

Kod izvođenja većih građevinskih radova, općinska služba nadležna za komunalne poslove može posebnim aktom odrediti ulice za odvoz i dovoz materijala.

U slučajevima kad postoji opasnost od pada materijala iz zraka, povređivanja prolaznika, izvođač radova je obavezan izvršiti natkrivanje prolaznog puta.

U slučaju da se investitor, odnosno izvođač radova ne pridržava mjera navedenih u ovom članu, građevinski inspektor zabranit će dalje izvođenje radova dok se uočeni nedostaci ne otklone.

Žalba izjavljena protiv rješenja o zabrani daljeg izvođenja radova ne zadržava njegovo izvršenje.

Član 45.

Zauzeti dio javne površine mora se ograditi propisnom ogradom koja se mora posebno označiti i osvijetliti po potrebi.

Građevinski materijal na gradilištu mora uvijek biti uredno složen, i to tako da ne sprječava oticanje oborinske vode i da ne ometa saobraćaj.

Član 46.

Izvođač građevinskih radova dužan je osigurati da se zemlja na gradilištu ne rasipa, a ostali rastresiti materijal treba držati u sanducima i ogradama.

Miješanje betona i maltera dozvoljeno je u posudama ili na limovima.

Ako se gradnja iz bilo kog razloga na duže vrijeme obustavi, građevinski inspektor može narediti da se sa javne površine uklone skele i drugi materijal.

Javna površina se po pravilu ne može koristiti za odlaganje zemlje, šuta ili drugog otpadnog građevinskog materijala, osim za onoliko materijala koliko se može odvesti u toku jednog dana.

Član 47.

Ako se građevinski materijal odlaže uz drveće, stabla se moraju zaštititi tako da se deblo stabla zaštiti oplatama koje ne smiju biti bliže od 15 cm od kore stabla.

Član 48.

Izvođač radova je dužan najkasnije 24 sata po završetku radova i uklanjanja opreme sa javne površine obavijestiti građevinskog inspektora da mu javna površina više nije potrebna.

Građevinski inspektor će izvršiti pregled zauzete površine, te ako se ustanovi da postoje oštećenja, donijeće rješenje o obavezi dovođenja zauzete površine u prvobitno stanje.

Član 49.

Za istovar drva, uglja i sličnih materijala, te za piljenje i cijepanje drva, prvenstveno se koriste dvorišta zgrada, a samo u slučaju da ne postoji mogućnost korištenja dvorišta dozvoljeno je da se potrebni dio javne površine privremeno upotrijebi u ove svrhe, ali isključivo na način da se time ne ometa saobraćaj vozila i pješaka.

Ogrevni materijal mora se ukloniti sa javne površine kao i dvorišta zgrada najkasnije u roku od 24 sata, a upotrebljena površina se mora očistiti, a eventualna oštećenja sanirati.

VIII ODLAGANJE ZEMLJE I OTPADNOG MATERIJALA

Član 50.

Izvođač građevinskih radova dužan je višak zemlje sa iskopa, građevinskog šuta i drugog otpadnog materijala odlagati na predviđena odlagališta-deponije.

Površinu za odlaganje viška zemlje iz iskopa i otpadnog građevinskog materijala privremenog i trajnog karaktera određuje općinska služba nadležna za poslove prostornog uređenja i građenja.

Član 51.

Izvođač, odnosno investitor građevinskih radova dužan je prije početka radova pribaviti odobrenje općinske službe nadležne za prostorno uređenje i građenje za odlaganje viška zemlje, građevinskog šuta i drugog otpadnog materijala.

U odobrenju iz prethodnog stava utvrđuje se mjesto deponije i količina materijala koja se može odložiti na deponiju, kao i visina naknade koju je izvođač, odnosno investitor dužan platiti na ime korištenja deponije.

Način plaćanja i visina naknade utvrđuje se odlukom o visini naknade za privremeno korištenje javnih površina.

Član 52.

Zabranjeno je odlagati zemlju, građevinski šut i drugi otpadni materijal izvan odlagališta predviđenih za tu namjenu.

Zemlju, građevinski šut i drugi otpadni materijal, odložen izvan odlagališta mora ukloniti odlagač, a u slučaju nepoznatog odlagača, pravno ili fizičko lice koga svojim rješenjem odredi građevinska inspekcija.

Zabranjeno je odlagati zemlju i otpadni materijal na gradsku deponiju kućnog smeća.

IX ODRŽAVANJE ČISTOĆE I ČUVANJE JAVNIH POVRŠINA

Član 53.

Pravna ili fizička lica koja obavljaju djelatnost u objektima uz javne površine dužna su svakodnevno dovesti javnu površinu u čisto i uredno stanje, ako zbog njihove poslovne i druge djelatnosti dolazi do prljanja prostora oko njegovog objekta.

Vlasnik ili korisnik rekreacionih objekata, zabavnih parkova ili igrališta, organizator javnih skupova, javnih priredbi i zakupac javnih površina koji ih povremeno koristi, obavezni su osigurati čišćenje površina koje služe kao pristup objektima ili za postavljanje objekata, tako da te površine budu očišćene u roku od 24 sata po završetku priredbe, odnosno vremena korištenja objekta.

Član 54.

Na javnoj površini ne smije se ostavljati niti bacati nikakav otpad te se površine ne smiju niti na bilo koji drugi način prljati, a posebno se zabranjuje:

- bacanje i ostavljanje izvan korpica ili drugih posuda za otpad raznog otpada kao i druge radnje kojima se prljaju javne površine,
- bacanje gorećih predmeta u korpice ili druge posude za otpad,
- odlaganje otpadnog građevinskog materijala, zemlje, ogreva svih vrsta i slično na javne površine,
- popravak, servisiranje i pranje vozila na javnoj površini,
- ispuštanje ulja, svih vrsta otpadnih tekućina, prljavih i masnih tečnosti, boja lakova i kreča, životinjskog izmeta, fekalija i bilo kojih drugih tečnosti koje prljaju javnu površinu,
- oštećenje korpica za smeće i drugih posuda za otpad, paljenje otpada, lišća, papira i slično,
- zagađivanje i bacanje otpada i otpadnih materijala u vodotoke i na obale vodotoka,
- ostavljanje i izlaganje na javnoj površini predmeta koji mogu uprljati ili povrijediti prolaznike,
- napasanje stoke na javnim površinama,
- vršenje nužde na javnim površinama, pljuvanje i slično,
- zauzimanje javnih površina vozilima koja nisu registrovana ili nisu u voznom stanju,

- parkiranje teretnih motornih vozila na parking prostorima u gradskoj zoni i ispred stambenih objekata.

Član 55.

Bez odobrenja nadležne općinske službe na javnim površinama je zabranjeno:

- prekopavanje javne površine,
- rekonstrukcija postojećih i izgradnja novih javnih površina,
- ograđivanje i postavljanje bilo kakvih uređaja, objekata, naprava, reklamnih panoa i sličnog na javnim površinama,
- odlaganje građevinskog materijala,
- kampiranje, postavljanje šatora, kamp-prikolica i slično,
- rezanje grana i vrhova drveća, obaranje i uklanjanje drveća, te vađenje panjeva.

Član 56.

Plan i program održavanja javnih površina donosi služba nadležna za komunalne poslove uz saglasnost Općinskog Vijeća, koju Općinsko Vijeće daje na prijedlog Općinskog Načelnika.

Nadzor nad izvršavanjem Plana i programa održavanja javnih površina vrši stručno lice, koje imenuje Općinski načelnik.

1. Javne zelene površine

Član 57.

Javne zelene površine moraju se održavati u skladu s utvrđenim Planom i programom održavanja javnih površina.

Redovno održavanje javnih zelenih površina vrši nadležno javno komunalno preduzeće ili pravno ili fizičko lice registrovano za obavljanje tih djelatnosti kojem je povjereno obavljanje komunalnih djelatnosti u skladu sa Planom i programom održavanja javnih površina.

Plan i program održavanja javnih površina pored ostalog obuhvata:

- redovno održavanje postojećih javnih zelenih površina,
- investiciona ulaganja na javnim zelenim površinama (formiranje novih zelenih površina, nabavka i ugradnja urbanog mobilijara i sl.),
- tekuće održavanje i investiciona ulaganja na komunalnim objektima u općoj upotrebi iz ove Odluke.

Član 58.

Pod održavanjem javnih zelenih površina podrazumijeva se posebno:

- obnova uništenog i dotrajalog biljnog materijala,
- sječa i uklanjanje sasušanih grana,
- obrezivanje i oblikovanje stabala i grmlja,
- okopavanje biljaka,
- košenje trave,
- đubrenje i prihranjivanje biljaka,
- uklanjanje otpalog granja, lišća i drugih otpadaka.
- uklanjanje štetnih biljaka,
- održavanje posuda s ukrasnim biljem,
- preventivno djelovanje na spriječavanje biljnih bolesti,
- uništavanju biljnih štetočina i kontinuirano provođenje zaštite zelenila,
- održavanje pješačkih staza, parkovskog mobilijara i druge opreme na javnim zelenim površinama u ispravnom stanju,
- postavljanje zaštitnih ograda od prikladnog materijala, odnosno sadnja živice na mjestima ugroženim od uništavanja,
- obnavljanje, a po potrebi rekonstrukcija javne zelene površine.
- skidanje snijega s grana.
- održavanje dječijih igrališta na javnim zelenim površinama.
- zalijevanje biljaka u sušnom periodu.
- ostale radnje neophodne da bi zelene javne površine služile svrsi, kao i drugi radovi utvđeni Planom i programom održavanja javnih površina.

Pokošena trava, lišće i drugi otpaci, moraju se odmah ukloniti s javne zelene površine.

Član 59.

Pravno ili fizičko lice koje upravlja javnim sportskim, rekreacionim i sličnim objektima, park šumama, grobljima i sličnim površinama, obavezno je održavati javnu zelenu površinu unutar tih prostora te se brinuti za njenu zaštitu i obnovu u skladu s odgovarajućim odredbama ove Odluke.

Član 60.

Javno komunalno preduzeće, odnosno fizičko ili pravno lice kome je povjereno vršenje poslova održavanja javnih zelenih površina, obavezno je redovno popunjavati drvorede, sasušena i bolesna stabla nadopunjavati stablima iste vrste, uklanjati suhe i bolesne grane, kao i biljne štetočine na javnim zelenim površinama.

Član 61.

Prilikom uređivanja (betoniranja, asfaltiranja, popločavanja i sličnog) površina na kojima postoje pojedinačna stabla, investitor, odnosno izvođač radova, mora ostaviti odgovarajuću obrubljenu slobodnu površinu, prečnika minimalno 0,80 metara, računajući od debla drveta.

Član 62.

Prekopavanje javnih zelenih površina, kao i ostalih javnih površina, radi postavljanja, uklanjanja, izmjene i održavanja podzemnih instalacija i uređaja, može se vršiti uz odobrenje općinske službe nadležne za prostorno uređenje i građenje, kojim se obavezno utvrđuje početak i završetak radova.

Uz zahtjev za izdavanje odobrenja za prekopavanje, izvođač radova je dužan priložiti stručno mišljenje općinske službe nadležne za geodetske poslove o položaju podzemnih instalacija i uređaja.

Za prekopavanje javnih površina izvođač radova je dužan platiti odgovarajuću naknadu, čija se visina utvrđuje u skladu s odlukom kojom su utvrđene naknade za korištenje javnih površina.

Izuzetno, iz stava 1. ovog člana, u slučaju iznenadnih i očiglednih kvarova na podzemnim instalacijama, organizacija koja upravlja instalacijama može izvršiti prekopavanje i otklanjanje kvara, s tim što je dužna prvog sljedećeg radnog dana zatražiti naknadno odobrenje za prekopavanje javne površine, a na način i po postupku utvrđenom u ovom članu.

Ukoliko se na javnoj površini na kojoj su izvođeni radovi iz stava 1. ovog člana u roku od 6 mjeseci od završetka izvođenja radova pojave deformacije/ulegnuća izazvana izvedenim radovima komunalni inspektor će izvođaču radova naložiti otklanjanje nastalih oštećenja.

Član 63.

Ukoliko se kolovoz raskopava po širini, raskopavanje se vrši po etapama, tako da jedna strana kolovoza uvijek bude osposobljena za odvijanje saobraćaja.

Ukoliko se radi o radovima takve prirode da se saobraćaj mora obustaviti, investitor je dužan da, uz saglasnost organa nadležnog za bezbjednost saobraćaja, zatvori ulicu, mjesto izvođenja radova označi propisnom signalizacijom i radove obavi u najkraćem mogućem roku.

Ukoliko se vrši raskopavanje trotoara po širini, izvođač radova je dužan da na odgovarajući način osigura bezbjedan prelaz pješaka preko iskopa, kao i da obezbijedi nesmetan prilaz prodavnicama, školama, autobuskim stajalištima i drugim važnijim objektima.

Član 64.

Po završetku radova izvođač je dužan da javnu površinu dovede u prvobitno stanje i da ukloni nečistoću s površine na kojoj su radovi izvođeni u roku navedenom u odobrenju općinske službe nadležne za prostorno uređenje i građenje.

U slučaju da izvođač ne izvrši obavezu iz prethodnog stava, građevinski inspektor će naložiti izvođenje potrebnih radova na teret izvođača.

Član 65.

Stabla na javnim zelenim površinama u blizini stambenih objekata, moraju se održavati tako da ne smetaju stanovanju te da u većoj mjeri ne pokrivaju dnevno svjetlo.

Grane i korijeni stabla ne smiju smetati javnoj rasvjeti i bezbjednosti saobraćaja.

Stabla i grane na javnoj zelenoj površini koja zaklanjaju saobraćajne znakove, smetaju vazдушnim vodovima (električnim, PTT i sličnim) moraju se uklanjati.

Uklanjanje stabala i grana, iz prethodnog stava, vrši javno komunalno preduzeće ili drugo fizičko i pravno lice kojem je povjereno obavljanje komunalnih djelatnosti u skladu sa zahtjevom općinske službe nadležne za komunalne poslove ili komunalnog inspektora.

Stabla koja smetaju i ugrožavaju bezbjednost ljudi i objekata na javnim površinama iz privatnih posjeda na bilo koji način, uklonit će vlasnik posjeda sam ili po nalogu komunalnog inspektora u roku od 7 dana od kada je konstatovana opasnost.

Ukoliko se radi o endemskim vrstama, općinska služba nadležna za komunalne poslove ili komunalni inspektor je dužna, prije sječe stabla, zatražiti mišljenje organa nadležnog za zaštitu endemskih vrsta biljaka.

Sječa stabala odobrit će se i u slijedećim slučajevima:

- ako je stablo potpuno prestalo sa vegetacijom,
- ako postoji opasnost od pada stabla,
- ako stablo svojim postojanjem i rastom ugrožava stabilnost stambenih ili poslovnih objekata i saobraćajnih površina,
- ako se stablo nalazi iznad vodovodnog ili kanalizacijskog cjevovoda čime ugrožava njihovu funkciju,
- u slučajevima potrebe izgradnje ili rekonstrukcije vodovodnih i kanalizacijskih cjevovoda i drugih instalacija, ukoliko se stablo nalazi na trasi, a radovi se nikako ne mogu izvesti bez sječe stabla,
- u slučajevima kad se stablo nalazi u blizini lokaliteta novoprojektiranog objekta za koje je izdato odobrenje za građenje sa obavezom investitora na naknadu troškova nadležnom javnom komunalnom preduzeću za sadnju novog stabla na drugoj javnoj zelenoj površini,
- u slučajevima kad komunalni inspektor, ocijeni da stablo svojim postojanjem i rastom ugrožava uslove življenja stanara okolnih objekata ili ugrožava same objekte.

Član 66.

Na javnoj zelenoj površini mogu se postaviti posude (žardinjere i saksije) s ukrasnim biljem i cvijećem, a po odobrenju općinske službe nadležne za komunalne poslove.

Vlasnik posude za cvijeće je obavezan istu održavati, nadopunjavati, obnavljati i čistiti, a ukoliko je vlasnik Općina Banovići, ove poslove obavlja općinska služba nadležna za komunalne poslove putem javnog komunalnog preduzeća ili drugog fizičkog ili pravnog lica kojem je povjereno obavljanje komunalnih djelatnosti.

Član 67.

Na javnim zelenim površinama je zabranjeno uzgajanje voćaka i povrtnih biljaka i bilo kakvo njihovo obrađivanje u poljoprivredne svrhe, osim u vanrednim situacijama.

Način i uvjete upotrebe zelenih površina u poljoprivredne svrhe u vanrednim situacijama odobrava služba nadležna za komunalne poslove.

Član 68.

Radi zaštite javnih zelenih površina, zabranjeno je:

- rezanje i skidanje grana i vrhova s ukrasnog drveća i bilja,
- guljenje kore stabla, zasijecanje, zarezivanje, savijanje, kidanje, zabadanje noževa, zabijanje eksera i vijaka, stavljanje plakata na drveće,
- penjanje po drveću.

- neovlašteno skidanje plodova s drveća i grmlja, kidanje i branje cvijeća, vađenje cvjetnih i travnatih busjena te kidanje grana s grmlja i drveća.
- neovlašteno sakupljanje i odnošenje suhog granja, kore, mladica izakonom zaštićenog ostalog bilja,
- uništavanje travnjaka, iskopavanje i odnošenje zemlje, humusa i biljaka,
- napasanje životinja na javnim zelenim površinama,
- oštećivanje i izvaljivanje stabala i grmlja,
- oštećivanje stabla raznim materijalima prilikom gradnje, utovara, istovara i dopreme građevinskog materijala, drva, uglja i drugog,
- oštećivanje opreme (ograde, uređaja za rekreaciju, vodovoda, javne rasvjete, parkovskih klupa i drugih uređaja opreme) te njihovo prljanje, zagađivanje i oštećivanje na bilo koji način,
- ispuštanje otpadnih voda, kiselina, ulja i fekalija na javne zelene površine,
- vožnja biciklom, motociklom, automobilom, ili teretnim motornim vozilom, osim ako se ta vozila kreću u svrhu održavanja javne zelene površine,
- parkiranje vozila na javnoj zelenoj površini,
- loženje vatre i potpaljivanje stabala,
- rezanje, odnosno prekidanje korjena stabla,
- pranje, čišćenje i popravka vozila na javnim zelenim površinama,
- istovar i skladištenje raznog materijala, ogrjevnog drveta, uglja, otpadnog drveta, željeza, lima i sličnog, na javnim zelenim površinama,
- bacanje otpadaka u bazene, fontane i na javne zelene površine,
- hvatanje i uznemiravanje ptica i ostalih životinja, kao i skidanje i oštećivanje gnijezda,
- upotreba u druge namjene površina namijenjenih za dječiju igru i korištenje sprava za igru od strane odraslih osoba, kao i upotreba ovih sprava suprotno njihovoj namjeni,
- ležanje i spavanje na parkovskim klupama, sjedenje na naslonima klupa i svako drugo nenamjensko korištenje i oštećivanje opreme.

Član 69.

Vozila parkirana na javnoj zelenoj površini ukloniće se i premjestiti na za to određeno mjesto u skladu sa propisima o bezbjednosti saobraćaja.

Član 70.

Lice koje učini štetu na zelenim površinama svojim štetnim radnjama, upotrebom vozila i slično, obavezno je nadoknaditi Općini pričinjenu štetu. Stvarna šteta se procjenjuje prema hortikulturnoj vrijednosti pojedine biljke, oštećenog objekta ili površine, a prema cjeniku pravnog ili fizičkog lica kome je povjereno održavanje zelenih površina.

U slučaju da lice koje je pričinilo štetu odbije da istu naknadi, protiv istog će se povesti sudski postupak za naknadu pričinjene štete.

2.Javne saobraćajne površine

Član 71.

Javne saobraćajne površine moraju se redovno čistiti i prati, te otklanjati na njima uočena oštećenja i nedostatke, a u skladu sa Planom i programom održavanja javnih površina.

Vanredno održavanje čistoće, na javnim saobraćajnim površinama vrši se po nalogu Službe nadležne za komunalne poslove uz saglasnost Općinskog Načelnika.

Vanredno održavanje čistoće na javnim saobraćajnim površinama odrediće se kada zbog vremenskih nepogoda ili sličnih događaja javna saobraćajna površina bude prekomjerno zaprljana, kao i kada je iz drugih razloga potrebno javne saobraćajne površine posebno očistiti.

Član 72.

Javne saobraćajne površine čiste se po pravilu danju, a peru noću u vremenu od 21 do 6 sati.

Za pranje javnih saobraćajnih površina koristi se isključivo industrijska voda.

Asfaltirane, betonirane i popločane javne površine ne mogu se prati ako je vanjska temperatura niža od 5 stepeni celzijusa, ili ako je javna površina prekrivena snijegom ili ledom.

Održavanje čistoće na javnim saobraćajnim površinama vrši javno komunalno preduzeće, odnosno pravno ili fizičko lice kome općina povjeri te poslove.

Član 73.

Saobraćajna signalizacija: vertikalna, horizontalna i svjetlosna, kao i druga oprema i uređaji na javnoj saobraćajnoj površini, moraju se redovno održavati u čistom i ispravnom stanju.

Zabranjeno je oštećivati ili uništavati postavljenu saobraćajnu signalizaciju.

Za uredno stanje i ispravno funkcionisanje saobraćajne signalizacije zadužena je općinska služba nadležna za komunalne poslove.

Član 74.

Ograde od ukrasne živice uz javne saobraćajne površine i u zoni raskrsnica ne smiju biti više od jednog metra.

Član 75.

Zabranjeno je svako prljanje kao i crtanje, štampanje i reklamiranje na javnim saobraćajnim površinama kojima se ugrožava bezbjednost saobraćaja.

Član 76.

Vozila koja učestvuju u saobraćaju ne smiju prljati javne saobraćajne površine.

Vozila koja prevoze tekući i rastresiti materijal moraju biti ispravna kako se iz njih ne bi prosipao teret.

Vozila koja prevoze sijeno, slamu, piljevinu, lišće i slične materijale moraju se prekriti ceradom ili na drugi način osigurati da se materijali koji prevoze ne prosipaju po javnim saobraćajnim površinama.

3. Čišćenje snijega i leda sa javnih površina i zgrada

Član 77.

Snijeg i led uklanjaju se sa javnih površina, kao i sa krovova zgrada uz javne saobraćajne površine.

Snijeg sa javnih površina počinje se uklanjati čim počne padati, a ako pada neprekidno mora se uklanjati više puta.

Led sa javnih površina uklanja se čim nastane.

Snijeg i led sa krovova zgrada uklanja se kad postoji mogućnost da se odrone i ugroze bezbjednost prolaznika i zgrada.

Član 78.

Uklanjanje snijega i leda sa javnih saobraćajnih površina određuje se Operativnim planom i programom zimske službe.

Operativni plan i program zimske službe donosi služba nadležna za komunalne poslove uz saglasnost Općinskog Vijeća, koju Općinsko Vijeće daje na prijedlog Općinskog Načelnika najkasnije do 1. oktobra za nastupajuću zimsku sezonu.

Javno komunalno preduzeće, odnosno pravno i fizičko lice kome je povjereno vršenje poslova zimske službe, dužno je redovno obavještavati općinsku službu nadležnu za komunalne poslove i organ odgovoran za bezbjednost saobraćaja o stanju javnih saobraćajnih površina, te o mjerama preduzetim za izvršavanje plana zimske službe za vrijeme dok postoje nepogodni vremenski uslovi.

Član 79.

Za uklanjanje snijega i leda sa javnih saobraćajnih površina (ulica i cesta) odgovorno je javno

komunalno preduzeće, odnosno pravno ili fizičko lice kome je povjereno vršenje poslova zimske službe.

Za uklanjanje snijega i leda sa krovova poslovnih zgrada odgovorno je preduzeće ili druga pravna ili fizička lica koja su vlasnici odnosno korisnici poslovnih prostora u tim zgradama.

Za uklanjanje snijega i leda sa krovova stambenih zgrada, odgovorni su vlasnici odnosno upravitelji zgrada.

Za uklanjanje snijega i leda sa trotoara, parkirališta, tržnica, sportskih objekata, autobusnih stajališta i sličnih prostora, odgovorno je pravno lice koje upravlja tim površinama ili se njima koristi, odnosno pravno ili fizičko lice kojoj je povjereno održavanje ovih površina.

Za uklanjanje snijega i leda sa trotoara uz zgrade odgovorni su upravitelji zgrada, vlasnici individualnih stambenih zgrada, poslovnih prostora u zgradi i samostalnih poslovnih prostora, a izuzetno za uklanjanje snijega i leda ispred uličnih lokala odgovorni su vlasnici i korisnici lokala.

Za uklanjanje snijega i leda sa pločnika uz kioske i pokretne uređaje odgovorni su vlasnici odnosno korisnici kioska i pokretnih uređaja.

Član 80.

Javne saobraćajne površine mogu se radi sprečavanja nastanka leda posipati odgovarajućim materijalom.

Kolovozi ispod kojih se nalaze kanalizacijski cjevovodi ili slivnici koji su izgrađeni od asfalta, betona ili kocki ne smiju se posipati materijalom granulacije veće u prečniku od 8mm.

Javne saobraćajne površine uz drvorede ne smiju se posipati solju ili drugim hemijskim sredstvima.

Član 81.

Zabranjeno je:

- iznošenje i gomilanje snijega iz dvorišta, bašča i drugih slobodnih površina na ulice i trotoare,
- bacanje snijega ispred zgrada na saobraćajnice,
- zatvaranje snijegom i ledom slivnika i šahtova,
- deponovanje snijega i leda u parkove i na zelene površine,
- sanjkanje i klizanje na javnim saobraćajnim površinama.

Član 82.

Pri uklanjanju snijega i leda ne smiju se oštećivati površine sa kojih se vrši uklanjanje, a niti objekti i nasadi na tim površinama.

Lice koje ošteti površine, objekte i nasade na površinama dužno je da ih dovede u prvobitno stanje.

X ODVODNJA ATMOSFERSKIH I OTPADNIH VODA S JAVNIH POVRŠINA

Član 83.

Putne kanale uz lokalne i nekategorisane puteve i ulične slivnike, kao uređaje za odvodnju atmosferskih i otpadnih voda s javnih saobraćajnih površina, održava javno komunalno preduzeće ili pravno ili fizičko lice kome općina povjeri vršenje ovih poslova a nadzor vrši ovlašteno lice.

Lica iz prethodnog stava su dužna redovno čistiti i održavati putne kanale, slivnike i slivničke veze propusnim i ispravnim, radi osiguranja od plavljenja javnih saobraćajnih površina.

Zabranjeno je nenamjensko korištenje slivnika.

Zabranjeno je otvorene slivničke kanale za odvođenje atmosferskih voda uz saobraćajnice premoštavati, začepljivati, zasipati kao i na svaki drugi način preusmjeravati vode cestovnog kanala, bez odobrenja općinske službe nadležne za komunalne poslove.

Zabranjeno je spajanje (upajanje) otpadnih i fekalnih voda u otvorene i uređene slivničke kanale.

Član 84.

Svi otvori (šahtovi, okna i slivnici) na javnim saobraćajnim površinama moraju se izvoditi prema važećim propisima i standardima, te održavati u ispravnom stanju.

Otvore (šahtovi) za vodovod, individualnu kanalizacionu mrežu, električnu, telefonsku i drugu instalaciju održava javno komunalno preduzeće, odnosno pravno ili fizičko lice koje te otvore koristi.

Član 85.

Svi otvori moraju biti zatvoreni tehnički propisanim poklopcima na kojima trebaju, po pravilu, biti sigurnosni zatvarači.

Poklopci moraju biti od rebrastog i hrapavog otpornog materijala, urađeni na način da se izbjegne klizanje.

Dotrajali i izlizani poklopci moraju se redovno mijenjati.

Dotrajali i nedostajući slivnici i slivničke rešetke, po nalogu nadležne inspeksijske službe, moraju se zamijeniti ili nadomjestiti novim poklopcima.

U vrijeme izvođenja bilo kakvih radova u otvorima, isti se moraju ograditi posebnim pregradama na način da sprečavaju prilaz prolaznicima, obilježiti vidljivim znacima upozorenja, a po završetku radova moraju se propisno zatvoriti.

XI SANITARNO-KOMUNALNO UREĐENJE NASELJA

1. Održavanje kanalizacijske mreže i septičkih jama

Član 86.

U naseljenim mjestima na području općine Banovići, koja imaju kanalizacijsku mrežu, svi nužnici kao i svi odvodi otpadnih voda moraju biti priključeni na tu mrežu.

U naseljenim mjestima u kojima ne postoji kanalizacijska mreža nužnici i odvodi otpadnih voda se moraju priključiti na septičke jame.

Septičke jame moraju biti izgrađene po svim propisima sanitarno-higijenskim uslovima i moraju se redovno održavati.

Septičke jame ne smiju imati nikakve preljeve, kojima bi se sadržaj izlijevao na susjedne parcele, drugu okolnu površinu ili vodotok.

Član 87.

Čišćenje septičkih jama obavljaju vlasnici septičkih jama, upravitelji zgrada, Javno komunalno preduzeće, odnosno pravno ili fizičko lice kome je povjereno vršenje ovih poslova u skladu sa sanitarno-tehničkim uslovima, a na zahtjev vlasnika septičke jame.

Čišćenje (pražnjenje) septičke jame vrši se odmah po njenom punjenju, a najmanje dva puta godisnje.

Član 88.

Vlasnici, upravitelji zgrada, Javno komunalno preduzeće, odnosno pravno i fizičko lice kome je povjereno vršenje ovih poslova, dužni su na vrijeme izvršiti čišćenje septičkih jama kako ne bi došlo do prelijevanja, a time i zagađivanje okoline.

Član 89.

Odvoz fekalija vrši se specijalnim motornim vozilima iz kojih se fekalije ne mogu prosipati.

Fekalije se istresaju u gradsku kanalizaciju, ili na mjesta koja odredi Javno komunalno preduzeće, odnosno pravno ili fizičko lice kome je povjereno održavanje kanalizacijskog sistema u Općini.

Član 90.

Visinu naknade za pražnjenje septičkih jama utvrđuje Javno komunalno preduzeće, odnosno pravno ili fizičko lice kome je povjereno vršenje ovih poslova, na koju svoju suglasnost daje Općinsko vijeće.

2. Držanje životinja i kafilerijski poslovi

Član 91.

Na urbanom području općine Banovići i vikend naselju Mačkovac, zabranjeno je držanje životinja.

Izuzetno i prethodnog stava dozvoljeno je držanje pasa, mačaka, ptica i drugih ukrasnih životinja, te raznih izložbenih malih životinja koje se uzgajaju u okviru sportskih društava evidentiranih kod nadležnih veterinarskih ustanova i pod nadzorom i kontrolom od strane nadležne veterinarske inspekcije, ukoliko se njihovim držanjem ne ugrožavaju susjedni korisnici stanova i objekata i ukoliko nisu ugroženi higijenski, sanitarni ili drugi uslovi gradskog prostora.

Član 92.

U ostalim naseljenim mjestima na području općine Banovići, držanje domaćih životinja i peradi dozvoljeno je pod slijedećim uslovima:

- da je obezbjeđen odgovarajući objekat za smještaj stoke i peradi ili odgovarajući ispust koji mora biti ograđen,
- da je obezbjeđen odgovarajući prostor za deponovanje stajnjaka,
- da je onemogućeno raznošenje stajnjaka i oticanje osoke iz đubrišta u putne kanale ili druge javne površine, kao i dvorišta susjednih objekata.

Objekti za smještaj stoke i peradi, prostor za deponovanje stajnjaka i ispust za stoku u odnosu na stambene, kulturne, zdravstvene i sve poslovne objekte moraju biti udaljeni najmanje 20 metara, kao i objekte koji se koriste za snabdijevanje vodom za piće moraju biti udaljeni najmanje 50 metara.

Član 93.

Postupanje sa psima, mačkama i drugim životinjama vrši se u skladu sa odredbama Zakona o zaštiti i dobrobiti životinja.

Ubijene, uginule i pregažene životinje (nepoznatih vlasnika), uklanjanju se sa javnih površina specijalnim vozilom, a pokopavaju se na mjestu koje odredi općinska služba nadležna za komunalne poslove.

Uginule, ubijene i pregažene životinje pokopavaju vlasnici na način koji odredi veterinarska stanica u saradnji sa veterinarskom inspekcijom.

Uklanjanje pasa litalica, mačaka i drugih životinja bez vlasnika, eutanazija i neškodljivo uklanjanje životinjskih leševa sa javnih površina, vrši Javno komunalno preduzeće, odnosno pravno i fizičko lice kome je povjereno vršenje ovih poslova.

Sahranjivanje gore navedenih životinja, vrši se u skladu sa sanitarno, tehničko higijenskim uslovima, odnosno propisima iz te oblasti.

Član 94.

Zabranjeno je puštanje i napasanje životinja na javnim površinama

Domaće životinje zatečene na javnim površinama, sa javnih površina uklanja čuvarska služba u sastavu JP «Komunalac» Banovići ili drugo pravno i fizičko lice kome se povjere gore navedeni poslovi.

Za čuvanje domaćih životinja do momenta predaje njihovom vlasniku, Javno komunalno preduzeće odnosno pravno ili fizičko lice iz prethodnog stava ima pravo naknade od vlasnika stoke po tarifi koja se određuje uz saglasnost Općinskog vijeća.

Protiv vlasnika uhvaćene domaće životinje nadležni općinski inspektor izdaje prekršajni nalog ili podnosi zahtjev za pokretanje prekršajnog postupka nadležnom općinskom Sudu za prekršaje.

Pod pojmom domaće životinje podrazumijeva se krupna i sitna stoka.

3. Dezinsekcija i deratizacija i održavanje vodotoka

Član 95.

U svrhu zaštite zdravlja građana i stvaranja uslova za svakodnevni normalan život, tokom godine obavlja se dva puta obavezna sistemska dezinsekcija i deratizacija javnih površina i kanalizacijskih sistema, uz njeno obavezno održavanje tokom cijele godine.

Član 96.

Pod pojmom sistemske dezinsekcije podrazumijeva se prskanje ili zamagljivanje odgovarajućim sredstvima u cilju uništavanja komaraca, muha i drugih insekta.

Pod pojmom sistemske deratizacije podrazumijeva se postavljanje odgovarajućih mamaca za uništenje miševa, pacova i drugih glodara, te prikupljanje i odstranjivanje uginulih životinja.

Član 97.

Obim, način vrijeme izvođenja i ostali uslovi obavezne sistemske dezinsekcije i deratizacije utvrđuje se operativnim planom koji donosi Načelnik općine, uz saglasnost Općinskog vijeća.

Za ostale otvorene prostore troškove obavezne sistemske dezinsekcije i deratizacije snose korisnici tih prostora.

Pravno ili fizičko lice kome su povjereni poslovi dezinsekcije i deratizacije, dužno je prije početka izvođenja radova obavijestiti građane putem sredstava javnog komuniciranja o početku i završetku tih radova.

Član 98.

Obaveznu sistemska dezinsekciju u stambenim zgradama vrše upravitelji zgrada. Obaveznu sistemska dezinsekciju-deratizaciju u zajedničkim prostorijama stambenih zgrada poslovnim zgradama i prostorima vrše upravitelji, vlasnici odnosno korisnici tih zgrada i prostora, a kanalizacijske sisteme vrsi Javno komunalno preduzeće, odnosno pravno ili fizičko lice kome su povjereni poslovi održavanja.

Član 99.

U svrhu zaštite vodotoka, redovno najmanje jedan puta u toku godine vrši se obavezno sistemsko čišćenje korita rijeka Litve, Radine i Ostrožne, kao i uklanjanje korova i drugog samoniklog rastinja sa obala i obalnog pojasa ovih rijeka.

Obim, način, vrijeme izvođenja i ostali obavezni uslovi sistematskog čišćenja korita rijeka Litve, Radine i Ostrožne, uništavanje korova na obalama i obalnom pojasu ovih rijeka utvrđuje se operativnim planom, koji donosi Načelnik općine uz saglasnost Općinskog vijeća, a na prijedlog općinske Službe nadležne za komunalne poslove.

XII UKLANJANJE PROTIV PRAVNO POSTAVLJENIH PREDMETA I NAPUŠTENIH VOZILA

Član 100.

Svi protiv pravno postavljeni predmeti i uređaji na objektima i javnim površinama (pokretni uređaji i naprave, reklamni i drugi panoji, natpisi firmi, prikolice, obavještenja, putokazi, stubići, posude za cvijeće, građevinski materijal, ogrjevi i slični predmeti i uređaji) moraju se ukloniti.

Rješenje o uklanjanju sa rokom uklanjanja koji ne može biti kraći od tri, niti duži od osam dana, donosi komunalni inspektor.

Ako vlasnik odnosno korisnik protivpravno postavljenog predmeta sam ne ukloni predmet, komunalni inspektor naredit će pismenim rješenjem korisniku, odnosno vlasniku njegovo uklanjanje.

Ukoliko vlasnik odnosno korisnik protivpravno postavljenog predmeta ne postupi po rješenju komunalnog inspektora, komunalni inspektor će naložiti uklanjanje predmeta putem drugog pravnog ili fizičkog lica na trošak vlasnika odnosno korisnika, uključujući i troškove premještanja i skladištenja

(čuvanja), te ukoliko je doslo do oštećenja javne površine uključuju se i troškovi dovođenja javne površine u prvobitno stanje.

Uklonjene predmete vlasnici su dužni preuzeti u roku od trideset dana uz namirenje nastalih troškova, a u suprotnom naplata troškova uklanjanja će se vršiti putem suda.

Član 101.

Napuštena, neregistrovana, havarisana i tehnicki neispravna vozila i njihovi dijelovi ostavljeni na javnim površinama duže od 15 dana uklonit će se o trošku vlasnika.

Napuštenim vozilom u smislu prethodnog stava smatra se vozilo za koje je očigledno da se ne može koristiti.

Ukoliko je vlasnik vozila nepoznat, komunalni inspektor će prije donošenja rješenja za uklanjanje vozila putem sredstava javnog informisanja pozvati vlasnika da u roku sedam dana ukloni vozilo sa javne površine, uz upozorenje da će u protivnom vozilo biti uklonjeno od strane javnog komunalnog preduzeća, odnosno pravnog i fizičkog lica kome je općina povjerila ove poslove.

Vlasnik je dužan svoje vozilo preuzeti u roku od 15 dana od dana uklanjanja uz namirenje svih nastalih troškova (troškovi uklanjanja, troškovi objavljivanja javnog oglasa, troškovi ležarine i slično).

U protivnom, nakon isteka roka iz prethodnog stava, vozilo se prodaje u sekundame sirovine radi namirenja nastalih troškova premještanja, skladištenja i troškova prodaje.

Prihod ostvaren prodajom ovih vozila uplacuje se u budžet općine Banovići.

XIII MJERE ZA PROVOĐENJE KOMUNALNOG REDA

Član 102.

Nadzor nad provođenjem komunalnog reda propisanog ovom Odlukom obavlja općinska služba nadležna za komunalne poslove, komunalna, urbanističko-građevinska, sanitarna i druga inspekcija svaka iz svoje nadležnosti i komunalni redari općine Banovići.

Poslove komunalne inspekcije, obavljaju komunalni inspektori, a poslove komunalne kontrole obavljaju komunalni redari

Komunalni inspektori i komunalni redari pri obavljanju poslova moraju imati posebnu odjeću, posebnu oznaku na odjeći i posebne službene iskaznice.

Službene iskaznice komunalnim inspektorima i komunalnim redarima propisuje Načelnik općine.

Načelnik općine donosi poseban Pravilnik o obliku, sadržaju i načinu izdavanja iskaznica, odjeće i oznaka na odjeći komunalnih inspektora i komunalnih redara

Član 103.

U vršenju komunalnog nadzora komunalni inspektor ovlašten je da:

- nadzire primjenu ove Odluke,
- naredi obavljanje radova ako pregledom utvrdi da se oni ne obavljaju u skladu sa odredbama ove Odluke, ili da se ne obavljaju potpuno ili pravilno,
- zabrani obavljanje radova koji se izvode bez odobrenja nadležne općinske Službe ili protivno tom odobrenju, odnosno suprotno odredbama ove Odluke,
- zabrani upotrebu neispravnog komunalnog objekta, uređaja ili naprave dok se ne otklone nedostaci,
- naredi uklanjanje predmeta, objekata i uređaja koji su postavljeni bez odobrenja, odnosno suprotno odredbama ove Odluke,
- podnosi zahtjev za pokretanje krivičnog, prekršajnog i drugih postupaka,
- izdaje prekršajni nalog i preduzima i druge mjere u skladu sa Zakonom i drugim propisima,

- komunalni inspektor ovlašten je da donose rješenja i zaključke za sprovođenje odredaba ove Odluke.

Član 104.

U vršenju komunalnog nadzora komunalni redar dužan je i ovlašten je da:

- prikuplja i obrađuje određene podatke za utvrđivanje činjeničnog stanja na terenu o čemu sačinjava zapisnik, službene zabilješke, foto dokumentaciju, uzima predmete sa javnih površina koji mogu poslužiti kao dokaz za dalji postupak vođenja inspeksijskog nadzora i izricanje prekršajnih naloga,
- obavlja poslove kontrole provođenja komunalnog reda i pomaže komunalnim inspektorima u vršenju inspeksijskog nadzora,
- upozorava pismeno ili usmeno pravna i fizička lica da su dužni da se ponašaju u skladu sa propisima i uputama komunalnih inspektora,
- prisustvuje i pomeže u izvršenju rješenja komunalnih inspektora,
- obavlja i druge poslove po nalogu komunalnih inspektora.

Član 105.

Komunalni inspektor i komunalni redar u obavljanju svojih poslova dužni su pridržavati se Zakona, ove Odluke i drugih propisa.

Komunalni inspektor i komunalni redar obavljaju poslove nadzora samostalno u ime Općine, postupaju i donose akte u okviru dužnosti i ovlaštenja utvrđenih ovom Odlukom i drugim propisima.

Preduzimanje mjera za sprovođenje komunalnog reda smatra se hitnim i od posebnog je interesa za općinu Banovići.

Član 106.

Ako izvršilac prekršaja ne postupi po rješenju komunalnog inspektora, istu radnju (uklanjanje, čišćenje, popravku, zamjenu i slično) komunalni inspektor će putem drugog lica preduzeti mjere za izvršenje gore navedenog o trošku izvršioca ili putem nadležnog Suda.

Član 107.

Pravna i fizička lica dužna su komunalnom inspektoru i komunalnom redaru omogućiti nesmetano obavljanje nadzora, a posebno pristup do prostorija, objekata, zemljišta, uređaja i naprava, zatim dati lične podatke, kao i pružiti druga potrebna obavještenja.

Član 108.

Ako komunalni inspektor i komunalni redar u svom radu naiđu na otpor, mogu zatražiti pomoć od nadležne Policijske stanice i drugih nadležnih tijela državne uprave.

Član 109.

Protiv upravnog akta komunalnog inspektora može se izjaviti žalba u roku od osam dana od dana prijema upravnog akta.

Žalba izjavljena protiv upravnog akta iz prethodnog stava podnosi se nadležnom općinskom organu utvrđenom aktom općinskog Vijeća i ne odlaže njegovo izvršenje.

Član 110.

Na prijedlog općinske službe nadležne za komunalne poslove, općinski Načelnik utvrđuje pojedine mjesece u godini kao mjesece uređenja i poboljšanja estetskog izgleda grada i Općine.

U ovim mjesecima sva pravna i fizička lica dužna su učestvovati u akcijama na uređenju i uljepšavanju estetskog izgleda grada i naseljenih mjesta a prema Programu aktivnosti koje utvrđuje Načelnik općine istovremeno sa proglašavanjem pojedinog mjeseca u godini za mjesec uređenja grada i Općine.

XIV NAKNADA ŠTETE

Član 111.

Svu štetu učinjenu na javnoj površini, objektima i uređajima koji čine njen sastavni dio, ili se nalazi na njoj, izvršilac je dužan popraviti, povratom u pređašnje stanje ili ako to nije moguće, dužan je nadoknaditi štetu.

Ukoliko izvršilac štete ne plati naknadu za učinjenu štetu, šteta će se naplatiti u odgovarajućem sudskom postupku.

Ukoliko je maloljetnik izvršilac štete iz stava 1. ovog člana dužni su roditelji, usvojitelji, odnosno staratelji istog, izvršiti nadoknadu spomenute štete.

Član 112.

Naknada štete može biti stvarna i paušalna a prema procjeni koju utvrdi Javno komunalno preduzeće, odnosno pravno ili fizičko lice kome je povjereno vršenje pojedinih komunalnih usluga ili poslova.

Član 113.

Paušalna naknada štete naplaćuje se u slučaju manje štete, ili ako procijenjena vrijednost se ne može sa sigurnošću utvrditi, ili ako bi postupak utvrđivanja štete vremenski duže trajao, a vrijednost štete ne premašuje 300 konvertibilnih maraka prema posebnom cjenovniku javnog komunalnog preduzeća, odnosno pravnog ili fizičkog lica kome je povjereno vršenje pojedinih komunalnih usluga.

Član 114.

Stvarna šteta naplaćuje se uvijek kao nastala šteta, ako prelazi iznos od 300 konvertibilnih maraka, i ako je za otklanjanje štete potrebno angazovanje trećih lica.

Član 115.

U postupku uklanjanja bespravno postavljenih predmeta na javnoj površini pored stvornih troškova premještanja i čuvanja, može se naplatiti paušalni iznos troškova i to:

- 100 konvertibilnih maraka za premještanje i
- 10 konvertibilnih maraka dnevno za po kvadratnom metru zauzete javne površine za uskladištenje.

XV KAZNENE ODREDBE

Član 116.

Novčanom kaznom u iznosu od 1.000 - 3.000 konvertibilnih maraka kaznit će se za prekršaj pravno lice:

1. ako postavi ogradu bez odobrenja iz člana 5.,
2. ako ne održava ogradu u skladu sa članom 6.,
3. ako se ne pridržava odredaba člana 7. ove Odluke,
4. ako se ne pridržava odredaba člana 8. ove Odluke,
5. ako se ne pridržava odredaba člana 10. ove Odluke,
6. ako se ne pridržava odredaba člana 11. ove Odluke,
7. ako postupa suprotno odredbama člana 12. ove Odluke,
8. ako postupa suprotno zabranama iz člana 13. ove Odluke,
9. ako se ne pridržava odredaba člana 14. ove Odluke,
10. ako se ne pridržava odredaba člana 15. ove Odluke,
11. ako se ne pridržava odredaba člana 16. ove odluke,
12. ako postupa suprotno odredbama člana 17. ove Odluke,
13. ako postupa suprotno zabranama iz člana 18. ove Odluke,
14. ako postupa suprotno odredbama člana 19. ove Odluke,
15. ako se ne pridržava odredba člana 20. ove Odluke,
16. ako ne pribavi odobrenje iz člana 25. ove Odluke,
17. ako postupa suprotno odredbama člana 28. ove Odluke,
18. ako postupa suprotno odredbama člana 29. ove Odluke,
19. ako ne pribavi odobrenja iz člana 31. ove Odluke,

20. ako postupa suprotno odredbama člana 32. ove Odluke,
21. ako postupa suprotno odredbama člana 33. ove Odluke,
22. ako postupa suprotno odredbama člana 35. ove Odluke,
23. ako postupa suprotno odredbama člana 38. ove Odluke,
24. ako ne pribavi odobrenje iz člana 39. ove Odluke,
25. ako postupa suprotno odredbama člana 40. ove Odluke,
26. ako se ne pridržava odredaba člana 41. ove Odluke,
27. ako se ne pridržava odredaba člana 42. ove Odluke,
28. ako se ne pridržava odredaba člana 44. ove Odluke,
29. ako se ne pridržava odredaba člana 45. ove Odluke,
30. ako se ne pridržava odredaba člana 46. ove Odluke,
31. ako se ne pridržava odredaba člana 47. ove Odluke,
32. ako se ne pridržava odredaba člana 48. ove Odluke,
33. ako se ne pridržava odredaba člana 49. ove Odluke,
34. ako se ne pridržava odredaba člana 50. ove Odluke,
35. ako ne pribavi odobrenje iz člana 51. ove Odluke,
36. ako postupa suprotno članu 52. ove Odluke,
37. ako se ne pridržava odredaba člana 53. ove Odluke,
38. ako postupa protivno odredbama člana 54. ove Odluke,
39. ako postupa protivno odredbama člana 55. ove Odluke,
40. ako se ne pridržava odredaba člana 58. ove Odluke,
41. ako ne postupa u skladu sa odredbama člana 59. ove Odluke,
42. ako se ne pridržava odredaba člana 60. ove Odluke,
43. ako ne pribavi odobrenje iz člana 61. ove Odluke,
44. ako se ne pridržava odredaba člana 62. ove Odluke,
45. ako se ne pridržava odredaba člana 63. ove Odluke,
46. ako ne postupa u skladu sa odredbama člana 64. ove Odluke,
47. ako ne postupa u skladu sa odredbama člana 65. ove Odluke,
48. ako ne postupa u skladu sa odredbama člana 66. ove Odluke,
49. ako postupa suprotno zabranama iz člana 67. ove Odluke,
50. ako postupa suprotno zabranama iz člana 68. ove Odluke,
51. ako se ne pridržava odredaba člana 71. ove Odluke,
52. ako se ne pridržava odredabam člana 72. ove Odluke,
53. ako se ne pridržava odredaba člana 73. ove Odluke,
54. ako se ne pridržava odredaba člana 74. ove Odluke,
55. ako postupa protivno zabrani iz člana 75. ove Odluke,
56. ako se ne pridržava odredaba člana 76. ove Odluke,
57. ako ne postupa u skladu sa odredbama člana 78. ove Odluke,
58. ako ne postupa u skladu sa odredbama člana 79. ove Odluke,
59. ako ne postupa u skladu sa odredbama člana 80. ove Odluke,
60. ako postupa protivno zabrani iz člana 81. ove Odluke,
61. ako se ne pridržava odredaba člana 82. ove Odluke,
61. ako se ne pridržava odredaba člana 83. ove Odluke,
63. ako se ne pridržava odredaba člana 84. ove Odluke,
64. ako se ne pridržava odredaba člana 85. ove Odluke,
65. ako se ne pridržava odredaba člana 86. ove Odluke,
66. ako se ne pridržava odredaba člana 87. ove Odluke,
67. ako se ne pridržava odredaba člana 88. ove Odluke,
68. ako se ne pridržava odredaba člana 89. ove Odluke,
69. ako se ne pridržava odredaba člana 91. ove Odluke,
70. ako se ne pridržava odredaba člana 92. ove Odluke,
71. ako se ne pridržava odredaba člana 93. ove Odluke,
72. ako se ne pridržava odredaba člana 94. ove Odluke,
73. ako se ne pridržava odredaba člana 97. ove Odluke,
74. ako se ne pridržava odredaba člana 98. ove Odluke,
75. ukoliko ne postupi po nalogu inspektora,
76. ukoliko ne omogući inspektoru vršenje radnje za koju je po zakonu i propisu ovlašten.

Za prekršaj iz stava 1. ovog člana, kaznit će se i odgovorno lice u pravnom licu novčanom kaznom u iznosu od 200-800 konvertibilnih maraka.

Za prekršaj iz stava 1. ovog člana, kaznit će se i fizičko lice novčanom kaznom u iznosu od 200-500 konvertibilnih maraka.

Član 117.

Ukoliko nadležni inspektor utvrdi postojanje prekršaja propisanog odredbama ove Odluke u skladu sa odredbama zakona o prekršajima izdaće prekršajni nalog ili podnijeti zahtjev za pokretanje prekršajnog postupka nadležnom sudu.

Član 118.

Kad je počinitelj prekršaja iz člana 116. ove odluke maloljetnik koji nije navršio 14 godina, a koji je prekršaj počinio zbog propuštanja dužnog nadzora roditelja, usvojitelja odnosno staratelja, a ove su osobe bile u mogućnosti takav nadzor vršiti, roditelj, usvojitelj ili staratelj maloljetnika bit će kažnjen za prekršaj kao da ga je sam počinio.

Član 119.

Prihod ostvaren naplatom novčanih kazni propisanih ovom Odlukom je prihod Budžeta općine Banovići.

XVI PRIJELAZNE I ZAVRŠNE ODREDBE

Član 120.

Općinski načelnik, Općinske službe za upravu, javna preduzeća dužna su donijeti sve akte predviđene ovom Odlukom u roku od tri mjeseca od dana stupanja na snagu ove Odluke.

Član 121.

Nadzor na primjenom odredaba ove Odluke vrši služba za nadležna za komunalne poslove i druge nadležne općinske službe.

Član 122.

Inspeksijski nadzor nad primjenom odredaba ove Odluke vrše općinski komunalni, sanitarno-higijenski inspektor i drugi inspektori svako iz svoje nadležnosti.

Član 123.

Danom stupanja na snagu ove Odluke prestaje važiti Odluka o komunalnom redu na području Općine Banovići broj:12/01-02-107/06 od 28.04.2006. godine.

Svi upravni, prekršajni i drugi postupci započeti do dana stupanja na snagu ove Odluke, okončat će se u skladu sa Odlukom iz prethodnog stava.

Član 124.

Odluka stupa na snagu danom objavljivanja u "Službenom glasniku općine Banovići".

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINA BANOVIĆI
OPĆINSKO VIJEĆE**

**PREDSJEDAVAJUĆI
OPĆINSKOG VIJEĆA**

Broj: _____/18
Datum: _____ 2018. godine

Delagić Nermin

Obrazloženje:

Pravni osnov za donošenje Odluke o komunalnom redu na području općine Banovići nalazi se, između ostalog, u članu 4, stav 2. *Zakona o komunalnim djelatnostima* („Sl. Novine Tuzlanskog kantona“, broj 11/05, 7/07, 8/12 i 14/13) koji glasi:

„Općine će svojim propisima bliže regulisati obavljanje pojedinih komunalnih djelatnosti“.

Osim toga, Odluka se naslanja na različite zakone i propise koji obuhvataju niz oblasti koje su predmet regulisanja ove Odluke a vezane su za:

- uređenje naselja,
- spomen obilježja,
- rekreacione i javne sportske površine,
- komunalne i objekte i uređaje u općoj upotrebi,
- autobusne i željezničke stanice,
- red kod istovara, utovara i smještaja građevinskog materijala i roba na javnim površinama,
- odlaganje zemlje i otpadnog materijala,
- održavanja čistoće i čuvanja javnih površina što uključuje i javne saobraćajne površine, odvođenju atmosferskih i otpadnih voda sa javnih površina, javne zelene površine, uklanjanje snijega i leda sa javnih površina,
- sanitarno komunalno uređenje naselja,
- uklanjanje protivpravno postavljenih predmeta i napuštenih vozila,

Odluka obuhvata i mjere za provođenje komunalnog reda, naknadu štete, kaznene odredbe u skladu sa *Zakonom o prekršajima* („Sl. Novine Federacije BiH“, br. 63/14) te prelazne i završne odredbe koje uključuju i vršenje inspeksijskog nadzora nad primjenom Odluke.

Prilikom izrade nacрта Odluke o komunalnom redu u obzir su uzeta i dosadašnja iskustva u primjeni još važeće Odluke o komunalnom redu u smislu izmjene i dopune onih odredbi koje su se tokom primjene u praksi pokazale kao manjkave i nedorečene.